



# Şeva piştgiriya Kobanê

**P**iştgiriya Kurdên li Elmanya û dostên wan ên Elman, ji bo berxwedana Kobanê dewam dike. Di şeva piştevaniya Kobanê û Şengalê ya li bajarê Saarbrückenê de, li gel Şaredar Charlotte Britz û nûnerê sendikaya DGB, Hevserokê HDP'ê Selahattin Demirtaş ji tevli şevê bû. Hevserokê PYD'ê Salih Muslim jî bi rêya telefonê ji beşdarî re axivî. Di şeva piştevaniya Kobanê û Şengalê ya li bajarê Elmanya Saarbrückenê de zêdeyî 2 hezar Kurdistani û dostên wan ên Elman amade bûn. Di axaftina li ser navê komîteya amadekar de hat destnîşankirin, ku bi saya berxwedana Kobanê pîrgirêka Kurd ketiye rojeva cihanê. Di axaftina komîteya amadekar de hat ragihandin, ku alîkarîdayîna Kobaniyî û Şengaliyan ji niha û pê

ve ji wê wezîfeya wan be.

## Şaredar Britz: Dê alîkarî dewam bikin

Şaredara Bajarê Mezin a Saarbrückenê ya ji partiya Partiya Sosyal Demokratî (SPD) Charlotte Britz derket ser dikê û diyar kir ku ji ber ew tevli çalakiya ji bo destekdayîna Kobanê û Şengalê bûye, 'serbilind' e. Britz da xuyakirin ku alîkarîdayîna mirovên Kobanê û Şengalê 'cîhê kêfxweşiyê' ye û got, "Kombûna ewçend girseyeke qelebalix li vê derê, ji bo min surprîz bû. Li Saarbrückenê kombûna ewçend mirovan ji bo Kobanê û Şengalê, tiştêkî xweş e." Britz da zanîn ku alîkarîyên ji bo Kobanê û Şengalê tên kirin, wê ji niha û pê ve ji dewam bikin.

## Berê û piştî Kobanê

Serokê eyaleta Saarland a sendikaya DGB Eugen Roth jî di axaftina xwe ya li şahiyê de bal kişand ser berxwedana Kobanê û anî ziman ku diroka Kurdan bi şeweyê 'Beriya Kobanê û piştî Kobanê' ji hev cuda ye. Roth got, "Cihanê, bi saya Kobanê ji nû ve Kurd kifş kir. Bi vê berxwedanê re cihan bi heyranî li Kurdan dinêre. Lewma divê Elmanya jî hêdî hêdî têkoşîna Kurdan bibîne û hîn bêhtir alîkarîyê bide." Li ser navê Konseya Penaberan a Saarlandê (Saarlandische Flüchtlingsrat) Roland Roder jî da xuyakirin ku qedexeya li ser PKK'ê ya li Ewropa bi taybetî ji li Elmanya bêwate ye. Roder bibîr xist ku PKK'ê bi destwerdanê re pêşî li bilançoya giran a komkujîya li Şengalê girtiye û got, "Eger PKK nebûya, Kobanê wê îro ji barba-

ran re bima. Û ji bo vê jî Kurdan bi têra xwe berdêl dan. Divê qedexeya li ser PKK'ê were rakirin, lê hema niha divê were rakirin."

## Divê cihan li cem me be

Hevserokê PYD'ê Salih Muslim jî bi rêya telefonê beşdarî çalakiyê bû û destnîşan kir ku berxwedana li Kobanê ji bo azadiya Kurdan e û wê 'heta dawiyê' dewam bike. Muslim ragihand ku berxwedana Kobanê ji bo tevahiya cihanê têkoşîna rûmetê ye û anî ziman ku di vê têkoşînê de ew dixwazin tevahiya cihanê li cem xwe bibînin. Hevserokê HDP'ê Selahattin Demirtaş jî di şeva li Saarbrückenê de amade bû û da xuyakirin ku li hemberî komkujiyên li Kobanê û Şengalê, Kurdên li Ewropayê 'rola dikeve ser milê xwe liştine'. Di şevê de Koma Dengê Mezopotamya, Koma Zel û Narîn, Xelîl Xemgîn, Kendal Manîş, Grîlya Sound derketin ser dikê û hunera xwe pêşkêş kirin. Li dû govendê jî sinevizyon hat nîşandan. ■ ANF/SAARBRUCKEN